

# Factsheet

## Examinaziuns da las renfatschas da mulesta tar RTS & RSI

### 1. Pertge èn las examinaziuns insumma vegnidas instradadas?

Ils 31 d'october 2020 ha la gasetta da la Svizra franzosa «Le Temps» publictà in artitgel davart cas da mulesta presumabels tar RTS. Il cussegl administrativ da la SSR ha agì immediat ed instradà mesiras ils 4 da november 2020 (la communicaziun a las medias chatt'ins [qua](#)).

En collavuraziun cun il partenari social, il Sindicat svizzer dals meds da massa (SSM), han ins instradà tar RTS (ed in pau pli tard era tar RSI) proceduras externas independentas. Quellas duain ir suenter a tut las annunzias davart mulestas, scuvrir tut ils cas da mulestas e procurar per il sancziunament dal cumportament da las persunas culpantas.

A medem temp ha il cussegl administrativ decidì da laschar examinar medemamain dad experts externs ed independents las responsabladads da l'entir personal directiv e da tut ils posts spezialisads involvids sur tut ils plauns da direcziun ora. Er il dispositiv existent cun l'incumbensa d'annunziar e d'evitar cumportament sbaglià en l'entir concern duai vegnir examinà cun agid d'experts externs. Eventuals mancos ston vegnir identifitgads ed eliminads.

### 2. Tge organs externs èn incumbensads cun las examinaziuns?

La chanzlia d'advocatas genevrina «Troillet Meier Raetzo» examinescha ils cas annunziads. Ils experts independents **Muriel Epard** e **Stanislas Zuin** analiseschan, schebain las persunas superiuras ed ils posts han surpiglià correctamain lur responsabladad en ils cas da RTS. E la **Revisiun interna da la SSR** examinescha, sch'ils instruments existents en l'entira interpresa per proteger l'integritad persunala da las collavuraturas e dals collavuratur bastan en la furma odierna e co che la cultura da manaschi po vegnir meglierada.

L'anteriura mediatura publica da la citad da Turitg e giurista **Claudia Kaufmann** sustegna la Revisiun interna per incumbensa dal cussegl administrativ da la SSR (la communicaziun a las medias chatt'ins [qua](#)).

### 3. Tenor tge criteris èn quests organs vegnids tschernids?

Il cussegl administrativ da la SSR ha tschernì ils organs d'examinaziun externs cuminaivlamain cun il partenari social, il Sindicat svizzer dals meds da massa (SSM), tenor lur qualificaziun ed expertisa.

### 4. Tge è il cuntegn exact / l'incumbensa exacta dals trais rapports d'examinaziun?

**E1: SRG** – La Revisiun interna da la SSR examinescha ils instruments da la SSR. Ella examinescha co ch'ils instruments che stattan oz a disposiziun per proteger l'integritad persunala da las collavuraturas e dals collavuratur funcziunan, sch'els èn enconuschents e vegnan utilisads avunda e sch'i dovra ulteriurs instruments per ina midada da la cultura en l'interpresa. La Revisiun interna vegn sustegnida da l'experta externa dr. Claudia Kaufmann.

**E2: RTS** – Mandat extern per examinar las responsabladads: Muriel Epard e Stanislas Zuin examineschan sco experts independents, sche las rollas e las responsabladads en ils cas da RTS èn stadas regladas cleramain e sch'il personal directiv ed ils posts spezialisads han surpiglià avunda responsabladad.

**E3: RTS** – La chanzlia «Troillet Meier Raetzo» examinescha ils trais cas ch'èn stads prominents en las medias. Ultra da quai aveva RTS endrizzà fin mez schaner 2021 ina hotline externa per annunziar incorrectadads en il mintgadi da lavur tar RTS. En tut hai dà ils ultims ventg onns 220 resuns. Tut las annunzias vegnan examinadas mintgina per sai ed en detagl e cas problematic elavura l'interpresa immediat.

**RSI** –Mandat extern per examinar ils resuns: en in'emprima fasa han ins fatg ina triascha da 38 «témoins». Ils «cas» da mulesta resp. violaziun da l'integritad persunala per propi èn vegnids surdads suenter a duas advocatas e dus advocats che als examineschan per incumbensa da RSI.

## 5. Era tar RSI è vegnida instradada in'examinaziun. Pertge è quella stada necessaria?

Suenter las renfatschas tar RTS han ins scleri la situaziun era tar las autras unitads d'interpresa da la SSR. Sin quai hai dà ils ultims mais era tar RSI en tut var 40 annunzias via ina hotline dal Sindicat svizzer dals meds da massa (SSM).

## 6. Pertge èn pertutgads surtut RTS e RSI, però betg SRF?

Suenter ch'ils cas tar RTS èn stads publics, ha la SSR er examinà la situaziun tar SRF. La direcziun ha appellà per e-mail a tut las collavuraturas ed a tut ils collavuradors d'annunziar incidents correspundents a las persunas da contact internas. Sin quai hai dà tschintg resuns che pertutgavan per part cas gia enconuschents ed elavurads. Tut ils resuns – era quels gia documentads – èn vegnids controllads anc ina giada en detagl. La HR ha discurrì cun las persunas pertutgadas e/u fatg examinaziuns.

Scleriments interns cumplexsiv han mussà nagins indizis ch'i dettia mulestas sexualas tar SRF – cun excepziun da cas singuls deplorabels. Examinaziuns externas cuntinuantas n'èn perquai betg previsas.

## 7. Tge custan questas examinaziuns?

Nus na faschain naginas indicaziuns davart ils custs. Las examinaziuns vegnan pajadas dal manaschi regular.

## 8. Pertge duri uschè ditg fin ch'ils resultats èn sin maisa?

Via la hotline endrizzada aposta èn entradas en tut var 220 annunzias. Il «Collectif de Défense» che ha accumpagnà la hotline ha vuli tegnair averta la lingia uschè ditg sco pussaivel per dar a las collavuraturas ed als collavuradors la chaschun da s'annunziar. Il numer da telefon è perquai stà en funcziun fin mez schaner 2021. Damai che las examinaziuns èn per part dependentas ina da l'autra, han las expertas ed ils experts independents supplitgà per dapli temp per pudair exequir las examinaziuns cun premura e per scriver ils rapports.

Annunzias anonimas èn vegnidas dadas vinavant a la chanzlia «Troillet Meier Raetzo» mo cun il consentiment da la persuna che ha fatg l'annunzia. Quai è stà in process che ha duvrà fitg bler temp. Tar RSI ha en pli la mandataziun da las advocatas e dals advocats externs independents duvrà dapli temp.

## 9. Co vesan ora ils resultats?

**Examinaziun 1:** Las examinaziuns n'èn betg anc terminadas. En il senn d'in rapport intermediar po vegnir constatà il suandant: Ils instruments existents per proteger las collavuraturas ed ils collavuradors èn manglus. Perquai ha il cussegl administrativ formulà directives impurtantas: i vegn etabli ina clera tenuta en favur d'ina politica da nulla toleranza. Tut las persunas cun funcziun da manar da tut ils stgalims surpiglian la responsabladad per il tema. La tematica sto vegnir prentida per mauns a moda offensiva cun lavur da prevenziun, sensibilisaziun, scolaziun ed infurmaziun. I duai vegnir introduci ina purschida duala da reclamaziun e cussegliaziun (persunas da confidenza internas e persuna da mediaziun externa). Il persunal cun funcziun da manar duai vegnir sensibilisà sistematicamain per il tema mulestas e las intervenziuns correspundentas en il rom d'ina scolaziun obligatorica. Tgi che n'observa betg las novas disposiziuns duai vegnir punì cun sancziuns specificas.

**Examinaziun 2:** Ils experts externs constateschan ch'il management ha agi a moda adequata en dus dals trais cas examinads. En il terz cas han ins constatà mancos da manar en las partiziuns spezialisadas. Quels vegnan elavurads da la direcziun da RTS. La direcziun da RTS responsabla quella giada ha surpiglià memia pouca responsabladad da surveglianza en ina moda betg gravanta. Il cussegl administrativ da la SSR ha perquai exprimi sia confidenza al directur general da la SSR ed al directur da RTS.

**Examinaziun 3:** Ils trais cas, dals quals las medias han rapportà en detagl, pertutgan differentas situaziuns. En l'emprim cas che concerna in collavuratur che ha en il fratemp bandunà RTS n'han ils

experts independents constatà nagina mulesta sexuala u mobing. Cuntrari al maletg che las medias han intermedià dal cas, n'è nagin dals fatgs rapportads vegnì valità sco act penal.

En ils dus auters cas examinads han ils experts dentant constatà acziuns ch'èn vegnidas qualifitgadas sco mulestas en il senn da l'artitgel 328 dal Dretg d'obligaziuns svizzer (responsabladad dal patron). Per motivs che han da far cun la protecziun da la personalitad che la SSR respecta na pon vegnir fatgas naginas ulteriuras indicaziuns davart ils singuls cas e las mesiras decididas.

En il rom da l'examinaziun 3 è stada en funcziun fin mez schaner 2021 ina hotline externa per annunziar incorrectadads en il mintgadi da lavur tar RTS. En tut hai dà ils ultims ventg onns 220 resuns. Tut las annunzias vegnan examinadas mintgina per sai ed en detagl e cas problematic elavura l'interpresa immediat.

## 10. L'examinaziun 1 n'è betg anc terminada – tge è vegnì fatg fin ussa?

- in'analisa fundada da las **reglas** existentas (reglaments e directivas, manuals, instrucziuns da lavur, descripcziuns da rollas etc.)
- **intervistas** cun numerus posts e gremis e bleras personas, intern ed extern, che han da far cun il tema directamain u indirectamain u che han in connex cun el
- **«analisa da la pratica optimala»** approfondada
  - analisa da studis, rapports d'evaluaziun e manuals davart il tema
  - examinaziun dals reglaments, dals posts da consultaziun e reclamaziun e dals process d'interpresas ed instituziuns cumparegliablas en Svizra ed a l'exteriur
- consideraziun dals **resultats da las autras examinaziuns** fin uss avant maun che pussibileschan conclusiuns sin aspects sistemics, culturals e structurals, uschenavant che talas constataziuns èn gia preschentadas.

Il **rapport final** è previs per la fin da zercladur 2021. El po vegnir finalisà pir cura ch'ils resultats da las autras examinaziuns èn sin maisa. Per concluder e realisar mesiras èn necessarias las constataziuns da tut ils projects e tut las examinaziuns. Per ina midada persistente da la cultura è basegnaivla in'optica cumplessiva che permetta l'interacziun tranter la cultura, ils princips da manar, las responsabladads, il clima da lavur ed ils instruments correspondents.

L'**analisa d'enfin qua e las recumandaziuns** che sa resultan da l'examinaziun 1 èn da chapir sco bilantscha intermediara fin ch'il rapport final è terminà. La concretisaziun da las recumandaziuns po succeder pir suenter l'inclusiun da tut ils resultats en il rom dal rapport final.

L'analisa d'enfin qua mussa però gia las suandantas tendenzas:

- I dovre ina **midada da paradigma** che premetta che las personas cun responsabladad da manar – da la direcziun suprema fin tar tut las superiuras e tut ils superiurs en lingia – sa sentian cumpetentas e responsablas per il tema, vivian la cultura giavischada dal cumportament respectus en contact cun il personal e dal clima da lavur senza tema e promovian tut quai sin lur stgalim.
- I vala d'establi ina tenuta clera e visibla d'ina **politica da nulla toleranza**.
- La tematica sto vegnir **prendida per mauns a moda offensiva** cun lavur da prevenziun, sensibilisaziun, scolaziun ed infurmaziun.
- Igl è d'introducir ina **purschida duala da reclamaziun e cussegliaziun** cun d'ina vart personas da confidenza internas e da l'autra vart intermediaturas ed intermediaturs externs.
- Quai che pertutga las reglas (p.ex. directivas en connex cun la protecziun da la personalitad) èn da definir **standards minimals unifurms e liants** che valan per las unitads d'interpresa.
- Las **rollas e cumpetenzas** da las personas spezializadas e dals posts spezializads a l'intern dal manaschi (p.ex. HR, incumbensads per l'egualitad da las schanzas, posts da consultaziun externs) èn da sclerir en vista a quest tema.
- Las novas directivas vegnan ussa discutadas en in process participativ sut la batgetta da la Revisiun interna e l'experta externa ensemen cun las personas incaricadas cun il tema ed en preschientscha da la direcziun. I va per rimnar propostas ed experientschas en connex cun las directivas e la realisaziun da quellas. Ellas vegnan integradas en il senn da recumandaziuns en il rapport final. Davart las mesiras definitivas decida il cussegl administrativ.

## 11. Vegnan ils rapports finals publitgads?

Il rapport d'examinaziun 2 (anonimisà) chatt'ins sut [www.srgssr.ch/de/news-medien](http://www.srgssr.ch/de/news-medien). En pli duai il rapport d'examinaziun 1 vegnir publitgà suenter ch'el è terminà. Quai vegn ad esser il cas probablamain l'entschatta da fanadur.

## 12. Tge mesiras per meglierar la diversidad e la promoziun da las dunnas existan gia oz tar la SSR?

- La rait da dunnas da la SSR «idée femme» è vegnida fundada il 2019 da las commembras da las direcziuns da las unitads d'interpresa e da la direcziun generala: Larissa M. Bieler, Lis Borner, Tamara Deflorin, Philippa de Roten, Milena Folletti, Ladina Heimgartner, Andrea Hemmi, Martina Vieli e Nathalie Wappler
- In **Diversity Board** fundà il 2019 procura per in'obligaziun pli gronda en connex cun la diversidad. La rait interna «**idée femme**» sustegna questa via.
- Cun il project «**Chance 50:50**» emprovan pliras redacziuns da rapportar en ina moda pli equilibrada quai che resguarda las schlattainas e da dar ina vusch ad expertas.
- La SSR na publitgescha naginas plazzas pli sulettamain per in **pensum da 100 pertschient**. Il pensum maximal è adina tranter 80 fin 100 pertschient.
- Cun il model «**Work Smart**» stgaffescha la SSR las cundiziuns da basa per lavur independenta dal temp e dal lieu.

La part da dunnas engaschadas tar la SSR importa oz 41%, la part da dunnas en posiziuns directivas importa 30%.

### Post da medias SRG SSR

Edi Estermann & Lauranne Peman

[medienstelle.srg@srgssr.ch](mailto:medienstelle.srg@srgssr.ch)

tel. 058 136 21 21